

四庫全書

史部

欽定四庫全書

史部

欽定續通志卷四十八

主事臣尹壯圖覆勘

總校官原任侍講臣王燕緒

欽定四庫全書

欽定續通志卷四十七

金紀一

太祖

太宗

太祖皇帝姓完顏氏諱旻本諱阿古達父世祖諱和哩
布母翼簡皇后納喇氏其先出靺鞨氏號勿吉勿吉古
肅慎地也勿吉有七部唐初有黑水靺鞨粟末靺鞨其
五部無聞黑水靺鞨東瀕海南接高麗五代時附屬契

丹其在南者係契丹籍號熟女真其在北者不係契丹籍號生女真生女真地有混同江長白山混同江亦名黑龍江所謂白山黑水也始祖諱哈富從高麗來居完顏部布爾罕水之涯部衆信服之生子德帝烏魯德帝生子安帝巴哈安帝生子獻祖綏赫獻祖徙居海古勒水耕墾樹藝始築室有棟宇之制自此遂定居于安春水之側生子昭祖舒嚕昭祖始立條教約束部衆及耀武于青嶺白山而勢乃寢強遼主官以特哩袞

按金史世紀載

昭祖時尚未有文字不知歲月晦朔年壽莫得而考而叙始祖乃云初從高麗來年已六十餘其叙明懿皇后亦云部有賢女年六十而未嫁似相矛盾茲節其緊要者補附太祖本紀內餘柴刑不錄生子景祖

烏古彙景祖稍役屬諸部諸部多聽命來歸遼主以為生女真節度使稱都太師自是有官屬漸立紀綱據其山川險要以計謀不使遼兵入境得知其道里遼主嘗欲刻印與之使係籍不從以厚貨易鄰鐵為甲冑兵勢大振時鄂敏水富察部特克紳特布水完顏部圖們水溫特赫部舍音水完顏部相繼來附卒年五十四生子

世祖和哩布及肅宗頗拉淑穆宗額魯溫世祖生康宗
烏雅舒及太祖自世祖肅宗穆宗康宗相繼為節度使
削平諸部康宗卒太祖嗣節度使位初遼道宗時有五
色雲氣屢出東方大若二十斛困倉之狀司天孔致和
竊謂人曰其下當生異人建非常之事咸雍四年戊申
七月一日太祖生世祖與拉必瑪察戰于野鵲水被四
創疾困坐太祖于膝撫之曰此兒長大吾復何憂太祖
舉止端重少即善射一日遼使坐府中見太祖手持弓

矢使射羣鳥三發皆中遼使矍然曰奇男子也太祖嘗
宴赫舍哩部南望高阜使衆射之皆不能至太祖一發
過之踰三百二十步後立射碑以誌焉太祖嘗遇壯士
托雲乘駿馬持槍來刺太祖不及備舅氏和爾和馳出
其間擊托雲槍折刺中其馬托雲僅得免又嘗遇敵兵
追急獨行隘巷中失道追者益急值高岸與人等馬一
躍而過追者乃還世祖寢疾太祖以事如遼統軍司將
行世祖戒之曰汝速了此事五月未半而歸則我猶及

見汝也太祖往見和囉木薩噶統軍既畢事前世祖沒
一日還至家世祖見太祖來所請事皆如志喜甚執太
祖手抱其頸而撫之世祖疾革謂穆宗曰烏雅舒柔善
惟此子足了契丹事世祖已擒拉必瑪察尚據哲克依
水肅宗使太祖先取瑪察家屬康宗至哲克依水圍之
太祖會軍親獲瑪察獻馘于遼遼命太祖為詳袞久之
以偏師伐尼瑪哈部伯赫布爾噶等乃以特通額為鄉
導沿水夜行襲之虜其妻子初溫都部巴圖殺唐古

部巴噶穆宗命太祖伐之乃與烏庫哩部兵沿屯水過
摩琳鄉追及巴圖于額斯瑋山北漵之間殺之薩哈以
都統伐塔克們圖瑋合實圖美伐達薩塔薩哈與將佐
議或欲先平邊地部落城堡或欲徑攻塔克城議不能
決願得太祖至軍中穆宗以甲士七十命太祖將以往
們圖瑋在穆魯密斯罕城下實圖美未到土人欲執們
圖瑋以與敵使來告急過太祖于實都甸太祖曰國兵
盡在此矣使敵先得志于們圖瑋後雖種誅之何益乃

分甲士四十與之自以三十人詣薩哈軍及至夜急攻之遼明破其衆還攻烏塔城遣普嘉努招卓多卓多乃降穆宗將伐蕭哈里募兵得千餘人女真兵未嘗滿千至是太祖勇氣百倍曰有此甲兵何事不可圖也哈里來戰與遼兵合因止遼人自為戰渤海留守以甲贈太祖太祖不受曰被彼甲而戰戰勝是因彼成功也穆宗令諸部不得擅置信牌馳驛訊事號令自此始一皆自太祖啓之康宗七年歲不登民多流莩强者轉而為盜

罕都等欲重其法太祖曰以財殺人不可財者人所致也遂減其法為徵償三倍民間多逋負賣妻子不能償太祖曰骨肉之愛人心所同願停三年勿徵自是遠近歸心焉太祖既襲位遼使阿息保來曰何以不告喪太祖曰有喪不能弔而乃以為罪乎赫舍哩阿蘓既奔遼

按金史世紀穆宗伐阿蘓阿蘓奔訴于遼而城破遂留于遼自後康宗嘗責遼以不遣阿蘓太祖又遣實古納等往索之是阿蘓之留遼久矣遼史云天慶四年阿蘓來奔金太祖遣人來索考天慶五年即金收國元年則天慶四年去穆宗有十餘年之遠遼史恐係誤載

初遼每歲遣使市名鷹海東

青于海上道出境內使者徵索無藝公私厭苦之康宗嘗以不遣阿蘓為言稍拒其使者太祖遣宗室實古納完顏尼楚赫往索阿蘓實古納等還具言遼主驕肆廢弛之狀于是召官僚耆舊以伐遼告之使備衝要建城堡修戎器以聽命遼使節度使尼格來問狀曰汝等有

異志乎

按遼史載天慶元年遼主漁于混同江生女真部長阿古達率其弟烏奇邁等來朝遼主以其

跋扈疑有異志大金國志載天慶四年遼主如混同江疑阿古達欲殺之金史載穆宗襲節度使位時朝遼主于漁所于太祖本紀不言有朝遼主事至太祖將伐遼遼乃使使以有異志未問狀亦非朝遼主而見疑也諸

書各異附
識于此

太祖曰設險自守又何問哉遼復遣阿息保

來詰之太祖曰我小國也事大國不敢廢禮大國德澤
不施而逋逃是主以此字小能無望乎若以阿蘓與我
請事朝貢苟不獲已豈能束手受制也阿息保還遼人
命統軍蕭托卜嘉調諸軍于寧江州太祖聞之使富卦
喇復索阿蘓實觀其形勢富卦喇還言遼兵多不知其
數太祖曰彼初調兵豈能遽集如此復遣華沙布往還
言惟四院統軍司與寧江州軍及渤海八百人耳太祖

曰果如吾言謂諸將佐曰遼人知我將舉兵集諸路軍備我必先發制之衆皆曰善乃入見宣靖皇后告以伐遼事即奉后率諸將出門舉觴東向以遼人荒肆不歸阿蘓井己用兵之意禱于皇天后土禱畢號令諸部達嚕噶部色爾袞來告曰聞舉兵伐遼我部誰從太祖曰與汝鄰境固當從我若畏遼人自往就之九月太祖將攻寧江州督諸路兵會于拉林水得二千五百人以遼之罪申告于天地傳檄而誓將至遼界先使宗幹督

士卒夷整既度遇渤海軍來攻左翼衆少却遼兵直犯
中軍會耶律色實墜馬遼人前救太祖射救者斃之復
射中色實宗幹與數騎陷遼軍中太祖救之免胄戰或
自旁射太祖太祖還射之一矢而斃謂將士曰盡敵而
止衆從之勇氣百倍遼軍大奔相蹂踐死者過半薩哈
在別路使人來賀且請稱帝太祖曰一戰而勝遂稱大
號何示人淺也進軍寧江州遼統軍司以聞時遼主射
鹿于慶州遣海州刺史高山壽應援

按遼主略不介意
惟遣一刺史應援

此正其致敗之由金史失載茲據續通鑑綱目補纂以戒先機之失諸軍填塹攻城寧江

人自東門出溫特赫額圖瑋邀擊盡殪之十月朔克其城獲防禦使大樂師努陰縱之使招諭遼人鐵驪部來送款次拉林城以俘獲賜將士名渤海梁福額特埒使之偽亡去招諭其鄉人曰女真渤海本同一家我興師伐罪不濫及無辜也使完顏羅索招諭係遼籍女真師還命諸路以三百戶為穆昆十穆昆為明安十一月遼都統蕭嘉哩副都統托卜嘉將步騎十萬

按珠赫店之役金史載十

一月遼都統蕭嘉哩副都統托卜嘉將步騎十萬而遼
史載十月發契丹奚軍三千中京禁兵及土豪二千別
選諸路合萬餘人命都統蕭嘉哩副都統托卜嘉將之
與金史異續通鑑綱目載十一月發契丹奚軍三千中
京禁兵七千以蕭嗣先為都統托卜嘉副之又與遼史
異大金國志載發奚契丹兵五千人兵潰復召宰相張
琳付兵十萬分四路悉為女真攻陷又與諸書
互異而據續通鑑綱目尤足見輕敵致敗之失會于鴨

子河北太祖自將擊之未至會夜方就枕若有扶其首
者三太祖寤曰神警我也即鳴鼓舉燧而行黎明及河
遼兵方壞陵道選壯士擊走之大軍繼進遂登岸甲士
三千七百至者纔三之一俄與敵過于珠赫店會大風

起塵埃蔽天乘風勢擊之遼兵潰逐至沃稜灤殺獲首虜及車馬甲兵不可勝計遼人嘗言女真兵若滿萬則不可敵至是始滿萬云翰魯敗遼兵斬托卜嘉富呼等攻賓州富察攻祥州拔之鐵驪王和勒博以所部降烏楞古敗遼軍于咸州西斬統軍羅索完顏羅索克咸州

按遼史云天慶三年三月阿古達率五百騎突至咸州四年舉兵攻寧江州考金史太祖攻寧江州前無以五百騎至咸州事及克寧江州後烏楞古敗遼兵于咸州完顏羅索克咸州亦非太祖親至也遼史又云天慶元年女真部長阿古達來朝四年攻寧江州據此則太祖為節度使四年而後稱帝考金史康宗于癸巳歲崩太

祖襲位至歲乙未以羣臣勸進乃稱尊號是為節度使
止二年也續通鑑綱目不載攻成州事其襲位年月與
金史同遼史則因誤記而失事實耳是月烏奇邁薩哈希卜蕪率官屬諸

將勸進願以新歲元日恭上尊號太祖不許阿里罕普
嘉努宗翰等進曰今大功已建若不稱號無以繫天下
心太祖曰吾將思之

收國元年 恭讀

御製全韻詩題金太祖云白山黑水本靈區勿吉七部原同
俗東方雲氣生異人端重善射炳智燭以此諸部漸歸附
素衣朱襪從于天適值遼政漸不綱混同迎戰似神告女
真滿萬不可敵至是其言驗如卜建國稱帝遂號金敗遼

達嚕窮追逐一百廿年帝業開天相柳亦由人勗按金太祖初生時即有五色雲氣之瑞固由天相然英謀叡畧算無遺策知人善任人樂為用故遼宋之事雖成于天會間而規模運為實自此始誠如

聖論

所定也謹錄于此

春正月壬申朔羣臣奉上尊號是日即皇帝

位帝曰遼以賓鐵為號取其堅也賓鐵雖堅終亦變壞惟金不變壞金之色白于是國號大金色尚白改元收國丙子帝自將攻黃龍府遼遣都統耶律鄂爾多左副統蕭伊蘓右副統耶律章努都監蕭色佛呼騎二十萬步卒七萬拒之帝率兵次寧江州西遼使僧嘉努來議

和國書斥帝名且使為屬國庚子進師逼達嚕噶城帝
登高望遼兵若連雲灌木狀顧謂左右曰遼兵心貳而
情怯雖多不足畏也遂趨高阜為陣宗雄以右翼先馳
遼左軍左軍却左翼出其陣後遼右軍皆力戰羅索尼
楚赫衝其中堅凡九陷陣宗翰以中軍助之帝使宗幹
往為疑兵宗雄已得利擊遼右軍遼兵遂敗乘勝追躡
至其營會日暮圍之黎明遼軍潰圍出迤北至阿嚕岡
遼步卒盡殪師還夏四月遼耶律章努來致書帝以書

辭慢侮留其副遣章努回報書亦如之五月甲戌拜天射柳故事五月五日七月十五日九月九日拜天射柳歲以為常六月己亥朔遼耶律章努復以國書來猶斥帝名帝亦斥遼主名以復之且諭之使降秋七月戊辰以弟烏奇邁為安班貝勒國相薩哈為古倫貝勒希卜蘓為愛滿貝勒弟舍音為古倫貝勒遼使薩喇以書來留之不遣九百奚營來降八月戊戌帝親征黃龍府次混同江無舟使一人導前乘赭白馬徑涉曰視吾鞭所

指而行諸軍隨之水及馬腹後使舟人測其渡處深不
得其底九月遂克黃龍府遣薩喇還遂班師癸巳以薩
哈為古倫烏赫哩貝勒阿里罕為古倫英實貝勒冬十
一月遼主自將七十萬至圖門駙馬蕭特默林牙蕭扎
拉等將騎五萬步四十萬至沃稜濼帝自將禦之十二
月己亥行次約羅諸將曰遼兵衆其鋒未易當吾軍速
來人馬疲乏宜駐于此深溝高壘以待之從之遣都古
爾訥尼楚赫鎮遠嚕噶丁未獲遼督餉者知遼主以章

努叛西還二日矣諸將曰今遼主既還可乘怠追擊之
帝曰敵來不迎戰去而追之欲以此為勇耶衆皆悚愧
願自効帝復曰誠欲追敵約齋以往無事餽饋若破敵
何求不得衆皆奮躍追及遼主于呼岱巴岡兵止二萬
帝曰彼衆我寡兵不可分視其中軍最堅遼主必在焉
敗其中軍可以得志使右翼先戰兵數交左翼合而攻
之遼兵大潰死者相屬百餘里所獲不可勝計蕭特默
等焚營遁去遂班師瓜爾佳薩哈取開州博勒和下德

里城薩里罕降

二年春正月戊子詔四方未降者加優恤諸部官民已降或為軍所俘獲逃遯而還者勿以為罪官其部長使從宜居處閏月高永昌據東京叛遼夏四月乙丑以幹魯統內外諸軍討高永昌華沙布等被害五月幹魯等敗永昌托卜嘉擒永昌以獻戮之東京州縣及南路係遼女真皆降詔除遼法省稅賦置明安穆昆以幹魯為南路都統德特貝勒額圖瑋破遼兵六萬于昭蕪城秋

九月始製金牌冬十二月庚申朔詔明年改元天輔

天輔元年

按大金國志云太祖在位六年以天輔元年為稱帝之始考弘簡錄載太祖珠赫店戰勝

後于次年開國建元收國與金史同續通鑑綱目亦于東政和五年書女真完顏阿古達稱帝國號金建元收國則大金國志明係脫誤而天輔實改元之始非稱帝之始也春正月舍音取泰州夏

四月遼秦晉國王耶律聶哱來伐都古爾訥羅索博勒和將兵二萬會咸州路都統烏楞古擊之五月丁巳詔自收寧江州已後同姓為婚者杖而離之秋七月戊申以完顏沃稜知東京事冬十二月甲子烏楞古等敗耶

律聶呼兵于羨藜山拔顯州乾懿豪徽成川忠等州皆

降是月宋使登州防禦使馬政以國書來

按諸帝紀內數見之與如

諸國聘問往來與夫春秋山禘享謁陵祈雨勸農之類歲以為常茲俱于初見處書之後不復叙其或因行常典而別有闕要則雖屢見必書以存其事實其略曰日出之分實生聖人竊

聞征遼屢破勅敵若克遼之後五代時陷入契丹漢地

願畀下邑

按金史載宋使登州防禦使馬政以國書來是宋先通好也宋史載金使李善慶來是金

先通好也宋史又載遣趙有開馬政報聘不至而復是未至金國也金史載馬政以國書來則是已至也考宋以得遼人李良嗣獻取燕之謀欲藉金以成夾攻之勢而金初無所資于宋則金不應先為通好自以金史為

正但所載宋書僅有乞地之語未及夾攻豈宋之始願
并欲不勞而獲耶今各仍其原文而所謂開端之迹兆
禍之基亦
因可見

二年春正月庚寅遼雙州節度使張崇降使索多如宋

報聘約夾攻

按續通鑑綱目載金遣李善慶索多以禮
物來修好詔蔡京等諭以夾攻之意未言

索多來約夾攻是欲夾攻者本係宋人啓貪見而昧禍
機故不顧與契丹數百年之好若金則兵力自足勝遼
何藉夾攻乃金史並未載宋來約夾攻而但載使索
多如宋約其夾攻恐係沿誤今仍原文而附識之所

請之地得者有之二月癸丑朔遼使耶律努格等來議

和辛酉貝勒都古爾訥羅索來見帝以遼主近在東京

而敢輒來皆杖之和勒博雙寬等劾奏咸州都統烏楞古命闖格代為都統而鞫治之烏楞古坐降穆昆三月壬辰遼使耶律努格以國書來庚子以羅索為萬戶鎮黃龍府夏五月丙申命呼圖克昆如遼六月甲寅詔有司禁民凌虐典催良人及倍取贖直者甲戌遼通祺雙遼等州八百餘戶來歸命分置諸部擇膏腴之地處之秋七月癸未詔博囉水路完顏珠勒呼淳海大嘉努等六穆昆之民可具其登耗以聞呼圖克昆還自遼耶律

努格復以國書來丙申呼圖克昆如遼遼戶二百來歸處之秦州詔遣阿里庫理嘉努德勒岱招諭未降者仍詔色埒等其降附新民善為存撫八月呼圖克昆還自遼耶律努格托迪復以國書來九月戊子詔選善屬文者以為國書詔令閏月庚戌朔以降將霍石韓慶和為千戶九百奚部蕭寶伊遜北部額哩頁漢人王六兒王伯龍契丹特默高從祐等各率眾來降遼耶律努格以國書來冬十月癸未以龍化州降者張應古劉仲良為

千戶乙未以降者李孝功渤海二哥為千戶十二月甲辰遣貝勒珠卜以定遼地諭高麗耶律努格以國書來遼懿州節度使劉宏以戶三千并執遼侯人未降以為千戶

三年春正月甲寅東京人為質者永吉等五人結眾叛事覺誅沒詔繼有犯者並如之三月耶律努格以國書來夏五月壬戌詔與遼和其兵興以前諸部民有犯罪流竄亡入于遼者明諭諸路千戶穆昆徧與詢訪其官

稱名氏地里具錄以上六月辛卯遼遣太傅實訥埒等奉冊璽來命摘冊文不合者數事復之索多還自宋宋使馬政及其子宏來聘索多受宋團練使帝怒杖而奪之宋使還復遣貝勒色埒赫嚕等如宋秋七月辛亥遼人楊詢卿羅子韋各率衆來降命各以所部為穆昆八月己丑頒女真字九月以遼冊禮使失期詔諸軍過江屯駐冬十一月實訥埒等復以國書來

四年春二月色埒赫嚕還自宋宋使趙良嗣王暉來議

燕京西京地三月甲辰帝以遼人和議無成惟飾虛辭
以為緩師之計乃議進討辛酉詔咸州路都統司以兵
會于渾河遼實訥埒以國書來夏四月乙未帝自將伐
遼以遼使實訥埒宋使趙良嗣等從行五月甲辰次渾
河西使宗雄先趨上京遣降者馬乙持詔諭城中上京
拒守帝謂實訥埒趙良嗣等曰汝可觀我用兵以下去
就帝親臨城督將士諸軍鼓譟而進自旦及巳棟摩以
麾下先登克其外城留守托卜嘉以城降趙良嗣等奉

觴為壽稱萬歲是日赦上京官民詔諭遼副統伊都王
戌次沃赫河宗幹言地遠時暑軍馬罷乏若深入敵境
糧餽乏絕恐有後艱帝乃班師命分兵攻慶州秋七月
癸卯至自伐遼冬十月戊辰朔日有食之十一月京東
留守司乞本京官民質子增數番代帝不許曰諸質子
已各受田廬若復番代則往來動搖可並仍舊十二月
宋復使馬政來請西京之地

五年春二月分諸路明安穆昆之民萬戶屯秦州以博

勒和統之賜耕牛夏四月乙丑朔宗翰請伐遼詔諸路
預戒軍事五月遼都統耶律伊都等詣咸州降閏月辛
巳古倫烏赫哩貝勒薩哈亮六月庚子詔烏奇邁貳國
政以舍音為烏赫哩貝勒普嘉努為溫貝勒宗翰為伊
拉齊貝勒秋七月庚辰詔議親征以連雨罷冬十一月
辛丑以杲為內外諸軍都統帥師伐遼以昱宗翰宗幹
宗望宗盤等副之甲辰詔諸軍見可而進無淹師期事
有從權毋須申稟若克中京所得禮樂儀仗圖書文籍

並先次津發赴闕

六年春正月乙亥都統杲取中京遂下澤州二月庚寅朔日有食之己亥宗翰等敗遼奚王錫默于北安壬寅都統杲遣使奏捷命分遣將士招降山前諸部宗翰駐北安遣希尹等畧地獲遼護衛耶律實訥埒知遼主獵鴛鴦灤殺其子晉王衆益離心遂報都統杲進兵襲之三月杲出青嶺宗翰出靺嶺追遼主于鴛鴦灤遼主奔西京宗翰復追至白水灤不及獲其貨寶壬申西京降

希尹追遼主于伊實部不及乙亥西京復叛是月遼秦
晉國王耶律聶哱即位于燕夏四月復取西京壬辰遣
圖克坦烏濟高慶裔于宋戊戌都統杲自西京趨白水
梁遣耶律坦招徠西南諸部西至夏棟摩羅索招降天
德雲內寧邊東勝等州獲阿蘓而還時山西城邑諸部
雖降人心未固遼主保陰山耶律聶哱在燕京都統杲
遣宗望入奏請帝臨軍五月辛酉宗望未奏捷耶律聶
哱遣使請罷兵戊寅使楊勉以書諭聶哱使之降六月

戊子朔帝親征遼發自上京烏奇邁監國是月耶律轟
呼卒秋七月甲子詔諸將無得遠迎以廢軍務壬午希
尹以阿蘓見杖而釋之八月己丑次駕鴛鴦濼都統杲率
官屬來見癸巳帝追遼主于大魚濼昱宗望追及遼主
于石輦鐸與戰敗之遼主遁己亥次居延北辛丑中京
將完顏瑋楚敗契丹奚漢六萬于高州貝勒瑪奇死之
昱宗望追遼主于諤勒哲圖不及九月庚申次草濼棟
摩平中京部族之先叛者及招撫沿海郡縣節度使耶

律慎思領諸部入內地歸化奉聖二州降冬十月丙戌蔚州降每獲一州下詔存恤赦罪免逋以安反側十二月帝伐燕京戊子次居庸闕庚寅遼統軍都監高陸等來送款帝至燕京入自南門使尼楚赫羅索陳于城上帝乃次于城南遼知樞密院左企弓虞仲文樞密使曹勇義副使張彥忠參知政事康公弼僉書劉彥宗奉表降辛卯遼百官詣軍門叩頭請罪詔一切釋之壬辰帝御德勝殿羣臣稱賀甲午命左企弓等撫定燕京諸州

縣遼蕭妃與官屬數人遁去詔發兵追之黃龍府叛宗
輔討平之

七年春正月丁巳遼奚王和勒博僭稱帝甲子遼平州
節度使時立愛降壬申詔招諭和勒博癸酉以時立愛
言招撫諸部己卯宋使來議燕京西京地庚辰宜錦乾
顯成川豪懿等州皆降甲申詔諸將無縱軍士動擾新
附人民以廢農業二月乙酉朔命薩巴招諭興中府降
之遼來隰遷潤四州皆降壬辰詔諭逃散未降之民存

恤遷戶毋輒騷動癸巳詔顯成東京諸路關津無禁民

往來宋使趙良嗣來請加歲幣以代燕稅

按宋以歲幣輸遼百餘年未嘗

形其匱乏至于會金攻遼造鑿失計及後加幣代稅借括許約而所費轉多誠如通鑑輯覽

御批

遼幣雖廢金幣旋加失算之中更為失算而危亡之患即因之以興也謹錄于此

及議盡疆與遣

使賀正旦生辰置權場交易并計議西京等事乙巳詔

都統果錄用新附之民有材能者戊申詔與宋燕京六

州之地癸丑大赦是月改平州為南京以張覺為留守

三月戊午以都統果等言召耶律瑪辰伊都烏舍道拉

等責以謀叛命杖道拉七十餘並釋之宋使盧益趙良
嗣馬宏以國書來夏四月丁亥遣幹魯宗望襲遼主
於陰山壬辰復書于宋遼兵復犯奉聖州林牙達實壁
龍門東二十五里都統幹魯聞之遣卓哩羅索馬和
尚等率兵討之生獲達實悉降其衆癸巳詔自今軍
事若皆中覆不無留滯應此路事務中都統司餘皆取
決樞密院命實古訥博勒和監護長勝軍及燕京豪族
工匠由松亭闕徙之內地己亥次儒州幹魯宗望等襲

遼權六院司喀勒扎於白水灤獲之其宗屬秦王許王
等降聞遼主留輜重青塚遣宗望羅索尼楚赫等追襲
及之宗望追及遼主決戰大敗之獲其子趙王實訥埒
及傳國璽五月甲寅南京留守張覺據城叛丙寅次野
狐嶺己巳次拉林灤受俘詔曰遼主孽雖自作嘗居大
位伶仃去國深所不忍如招之肯來盡付戚屬并宗族
勿去輿帳善存撫之其實訥埒以下及諸官吏並釋其
罪且加撫慰奚路都統達蘭攻蘓庫卓琳托紐所部十

三巖皆平之又遣奚馬和尚攻薩必達噶噶并五院司
諸部執其節度伊里和勒博為其下所殺六月壬午朔
次駕鵞灤是日棟摩敗張覺于營州丙申帝不豫將還
上京命宗翰為都統昱與幹魯副之駐兵雲中以備邊
己酉次鄂都山驛台安班貝勒烏奇邁秋八月辛巳朔
日有食之乙未次渾河北安班貝勒烏奇邁率宗室百
官上謁戊申帝崩于布圖灤西行宮

宋史作五月

年五十六

九月癸丑梓宮至上京諡曰武元皇帝加諡應乾興運

昭德定功睿神莊孝仁明大聖武元皇帝廟號太祖陵
曰睿陵

太祖收國二年天輔七年在位凡九年

太宗皇帝諱晟本諱烏奇邁世祖第四子太祖母弟也
初為穆宗養子收國元年十月命為安班貝勒太祖征
伐常居守天輔七年六月太祖次駕鴛潔有疾至鄂都
山驛召帝赴行在詔曰今遼主盡喪其師奔于夏國遼
官多囉約索等劫其子聶呼而立之已留宗翰等措畫

朕親巡已久功亦大就所獲州部正須綏撫是用還都
八月中旬可至春州汝率內戚迎我若至豹子崖尤善
八月乙未會于渾河北戊申太祖崩九月乙卯葬太祖
于宮城西古倫貝勒果鄂王昂宗峻宗幹率宗親百官
請正帝位不許固請亦不許宗幹率諸弟以赭袍被體
寘璽懷中丙辰即皇帝位 恭讀

御製

全韻詩題金太宗云天輔草創天會繼滅遼北朝歸掌
握南征徽欽就拘繫高宗稱姪慈不覺其勢頗可成一統
未乘時實失商推武功既昭修以文勸農議禮並制樂傳
位熙宗繼太祖大公量吏人難學按金太宗朝以舍音宗

幹知國政以宗翰宗望總戎事武功文德克成經國規模而傳位熙宗使太祖世嗣不失正緒可謂行其所難

誠如

一製

所謂大公難學也謹錄於此 己未告祀天地丙寅大赦

改天輔七年為天會元年癸酉發粟賑降人之徙于上

京者戊寅詔諸明安賦米給戶口在內地匱乏者冬十

月壬辰詔以空名空頭百道給西南西北兩路都統宗

翰以便宜從事十一月命宗望問棟摩罪以其討張覺

敗績也詔諭南京割武朔二州入于宋

按宋史作朔武蔚三州又係太

祖所割為天輔七年五月時事俱與此異

貝勒鄂勒博及巴喇繖破走伊實

布達於歸化己巳徙遼潤來濕四州之民於潘州庚午

宗望及張覺戰於南京大敗之張覺奔宋

按金史太祖本紀載張覺五月

據城叛是時尚未奔宋也太宗本紀載十一月張覺戰敗奔宋而宋史載五月太祖殂六月張覺以平州來附

失事之實城中人執其父及二子以獻戮之軍中壬申張忠

嗣張敦固以南京降復叛己卯詔女真人先有附于遼

今復虜獲者悉從其所欲居而復之其奴婢部曲昔雖

逃背今能復歸者並聽為民十二月辛巳蠲民間貸息

詔以咸州以南蘓復州以北年穀不登其應輸南京軍

糧免之甲午又詔比聞民間乏食至有鬻其子者其聽以丁力等者贖之是日以杲為安班貝勒宗幹為古倫貝勒遣李靖如宋告哀

二年春正月庚戌朔以們圖琿為阿斯罕貝勒參議國政戊午詔贖同姓人自鬻及典質者癸亥以東京比歲不登詔減田租市租之半甲戌宗翰宗望請勿割山西郡縣與宋帝曰是違先帝之命也其速與之夏國奉表稱藩以下寨以北陰山以南伊實伊喇部圖嚕潔西之

地與之內子貽宋書索俘虜叛亡丁母始自京師至南
京每五十里置驛二月詔有盜發遼諸陵者罪死庚寅
詔命給宗翰馬七百匹田種千石米七千石以賑新附
之民乙巳詔諭南京官僚小大之事必關白軍師無得
專達朝廷丙午宗翰乞濟師詔有司選精兵五千給之
丁未命宗望凡南京留守及諸闕員可選勲賢有人望
者就注擬之具姓名官階以聞三月己酉朔命宗望以
宋歲幣銀絹分賜有功將士宗望請選良吏招撫遺潤

來隰之民保山砦者又以南京反覆凡攻取之計乞與
知樞密院事劉彥宗裁決之辛未夏國王李乾順遣使
上誓表閏月戊寅朔賜夏國誓詔辛巳命置驛上京春
秦之間己丑烏庫哩達魯特兩部來降以宗翰言罷割
山西諸鎮與宋舍音襲約尼扎古雅走之獲其妻孥羣
從及豪族貝勒瑋楚等破奚七巖而撫之夏四月己酉
以宗翰經畧西夏且賞其破遼之功賑上京路西北路
降者及新徙嶺東之人戊午以實古納所築上京新城

名會平州乙亥詔贖上京路新遷寧江州戶口賣身者
六百餘人宋遣使來弔喪以高卓佛和等充遺留國信
使高興輔劉興嗣等充告即位國信使如宋五月癸未
詔新降之民訴訟者衆今方農時或失田業可俟農隙
聽決乙巳海蘭路軍帥完顏呼嚕古等言往者歲捕海
狗海東青鴉鶻於高麗之境近以二舟往高麗乃盡殺
二舟之人帝曰以小故起戰爭甚非所宜今後非奉命
毋輒往棟摩克南京殺都統張敦固秋七月壬午皇子

宗峻薨壬辰和碩台言高麗納吾叛亡增其邊備必有
異圖詔以毋先犯彼或侵畧與之從事乙未烏瑋部及
諸營叛以齋貝勒昱等討平之八月乙巳朔以貝勒烏
哲訥等為賀宋生辰使丁巳六部都統達蘭擊走扎古
雅殺其隊將克爾叟博斯呼等又破降駱駝山金源興
中諸軍詔增給銀牌十冬十月甲辰朔夏國遣使謝誓
詔甲子詔發寧江州粟賑秦州民被秋潦者約尼扎古
雅率衆來降興中府降丙寅詔有司運米五萬石于廣

寧以給南京潤州戍卒命棟摩益兵以備高麗戊辰幹
魯奏遼托卜嘉來奔言耶律達實自稱為王遼主從者
不過四千戶有步騎萬餘欲趨天德駐伊都谷詔酌事
宜毋輒專行十一月癸未棟摩下宜州殺節度使韓慶
民癸卯詔以米五萬石給蘭達實古納

三年春正月戊子韓資正加尚書左僕射為諸宮都部
署二月壬戌羅索奏獲遼主詔以赴京丁卯以巴噶城
地分授所徙烏庫哩德埒勒二部及契丹民三月乙亥

阿斯罕貝勒側圖琿亮丙子賑奚契丹新附之民辛巳
建乾元殿韓魯獻傳國璽以瑪克實來附請授印綬是
日賜完顏羅索鐵券夏六月庚申以獲遼主遣李用和

宋史作
李孝和

等充告慶使如宋秋七月壬申禁內外官宗室

毋私役百姓八月癸卯韓魯以遼主至京師甲辰告于

太祖廟丙午遼主延禧入見降封海濱王壬子詔有司
揀閱善射勇健之士以備宋九月癸巳瓜爾佳薩哈有
罪伏誅以圖克坦烏里代之冬十月甲辰詔諸將伐宋

按金史天會三年十月詔諸將伐宋而宋史乃云七月河東言鼎赫至雲中考鼎赫在天會二年四月詔經略西夏及是奉詔伐宋則宋人安得以七月至雲中先知其意在于宋也弘簡錄所載與此同宋史有失事實

以果兼領都元帥宗翰兼左副元帥完顏希尹為元帥右監軍耶律伊都為元帥右都監自西京入太原達蘭為六部路都統舍音副之宗望為南京路都統棟摩副之劉彥宗領漢軍都統自南京入燕山詔建太祖廟于西京召頁嚕教授女真字丁巳以棟摩為南京路都統素赫副之宗望為棟摩劉彥宗兩軍監戰壬戌詔曰今

大有年無儲蓄則何以備飢饉其令牛一具賦粟一石
每穆昆為一廩貯之宋易州戍將韓氏殺以軍降處之
蔚州十一月辛卯以張忠嗣權簽南京中書樞密院事
十二月庚子宗翰下朔州甲辰宗望諸軍及宋郭樂師
張企徽劉舜仁戰于白河大破之藥師降燕山州縣悉
平戊申宗翰克代州乙卯中山降丙辰宗望破宋師于
真定戊午宗翰圍太原伊都破宋河東陝西援兵于汾
河北甲子宗望克信德府

四年春正月丁卯朔始朝日戊辰宗弼取湯陰大臭攻
下瀋州達呼布取黎陽己巳諸軍渡河庚午取滑州宗
望使吳孝民等入汴問宋取首謀平山叛人張覺及帥
臣童貫等宋太上皇帝出奔癸酉諸軍圍汴甲戌宋使
李稅來謝罪且請修好宗望許之戊寅宋增歲幣以康
王構少宰張邦昌為質誓書稱姪大宋皇帝伯大金皇
帝癸未諸軍解圍二月丁酉朔宋將姚平仲以兵四十
萬夜襲宗望營敗之己亥復進師圍汴宋使宇文虛中

以書來許割太原中山河間三鎮地改以肅王樞為質
遣康王構歸師還壬子以滑瀋二州與宋宗翰定威勝
軍攻下隆德府丁巳次澤州海濱王家奴誣其主欲亡
去詔誅之三月癸未尼楚赫圍太原宗翰還西京夏四
月癸卯宗望使宗弼來奏捷乙丑耿守忠等大敗宋人
于西都谷五月辛未宋种師中以兵出井陘癸酉完顏
和尼敗之斬師中于陣是日巴爾斯敗宋姚古軍于隆
州谷六月丙申朔高麗國王王楷奉表稱藩庚申以宗

望為右副元帥秋七月丙寅遣高伯淑等宣諭高麗壬申命大臬以所領渤海軍八明安為萬戶蕭仲恭使宋還上宋帝與耶律伊都蠟書八月庚子詔左副元帥宗翰右副元帥宗望伐宋諸將屢敗宋師所至以城降癸丑宗望發保州九月丙寅宗翰克太原執經略使張孝純己巳復以南京為平州辛未宗望破宋种師閔軍于井陘取天威軍克真定殺其守李邈冬十一月甲子宗翰自太原趨汴丙寅宗望自真定趨汴戊辰宗翰下威

勝軍癸酉薩喇達破天井關乙亥宗翰克隆德府和尼
渡盟津西京永安軍鄭州皆降庚辰宗翰克澤州宗望
諸軍渡河臨河大名二縣德清軍開德府皆下丙戌克
懷州是日宗望至汴閏月壬辰朔宋出兵拒戰宗望等
擊敗之癸巳宗翰至汴丙辰克汴城辛酉宋主桓出居
青城十二月癸亥宋主桓降是日歸于汴城庚辰詔所
在長吏敦勸農功

五年春正月癸巳宗翰宗望使使以宋降表來上乙未

知樞密院事劉彥宗上表請復立趙氏不聽丁巳回鶻
哈喇汗遣使入貢二月丙寅詔降宋二帝為庶人三月
丁酉立宋少宰張邦昌為大楚皇帝割地賜夏國夏四
月乙酉克陝府取魏州丙戌以達蘭為元帥左監軍棟
摩為元帥左都監宗翰宗望以宋二帝歸初宋主桓降
宋將范瓊逼上皇皇后皇太子及諸王如青城至是俱

北歸

按金史載宗翰宗望以宋二帝歸而未載皇后皇太子等似于後所載歸宋之喪及海陵誅宋宗室

數十餘人諸事毫無原委而宋史乃云金人逼入青城不稱范瓊逼如金軍又失亂臣賊子春秋必誅之道茲

謹遵

御批通鑑輯覽書法補纂

詔哈斯罕諸部與新附人其在降

附之後同姓為婚者離之五月庚寅朔宋康王構即位

于歸德宋主以張邦昌為太保久之賜死

按宋史康王即位以張邦

昌為太保詔稱知機達變勲在社稷久之以李綱言其僭逆賜死潭州恭讀通鑑輯覽

御批宋高宗于張邦昌非惟不較其僭逆之蹟且陰德其擁戴之功其終從寬放特因李綱執持大義知公論所在不得已而行之此真推見隱微萬古不易之論也金史于康

王即位下即云宋殺張邦昌于事理殊未清晰今據

宋史羅索降解絳慈隰石河中竒嵐寧化保德火山諸

城達蘭徇地山東下密州達呼下單州廣信軍降六月

庚申詔曰自河之北今既分畫宜撫其民毋肆俘掠庚辰右副元帥宗望漢國王宗傑繼亮秋七月甲午賜宗翰券書八月丙戌以宗輔為右副元帥詔河北河東郡縣職員多闕宜開貢舉取士以安新民其南北進士各以所業試之九月丁未詔以內地諸路每耕牛一具賦粟五斗以備歉歲辛亥賜完顏希尹尼楚赫券書棟摩取河間大敗宋兵于莫州雄州降達蘭克祁州永寧軍保州順安軍皆降冬十月宋二帝自燕徙居于中京十

二月丙寅右副元帥宗輔伐宋徇地淄青烏凌阿托雲
敗宋將李成於淄州趙州降阿里庫徇地濟州敗宋兵
遂取滑州乙亥西南路都統幹魯堯

六年春正月丙戌朔宗弼破宋鄭宗孟于青州尼楚赫
諸軍所至克降甲寅宋將馬括兵次樂安宗輔擊敗之
聞宋主在維揚以農時還師宗弼敗宋兵于河上二月
以所克洛陽襄陽潁昌汝鄭均房唐鄧陳蔡諸處之民
遷于河北宗翰復遣羅索攻下京兆同華河中鳳翔諸

處宋經制副使傅亮以兵降

按宋史河東經制副使傅亮以兵降載在正月金史

擒經制使傅亮載在二月經制使經制副使以擒以降二月正月彼此俱異考宗翰破京兆府永興軍時經略

使唐重等皆死而傅亮不聞與其難若金史以擒書似兵敗見執于傅亮之罪隱而未彰宋史云以兵降得事

之實今據改

三月壬辰命實古納籍完顏慎思所領諸部及

未置明安穆昆戶來上己酉達蘭下恩州夏五月戊戌

伊遜特古斯以本部來附六月己未詔求祖宗遺事達

蘭遣兵徇下磁州信德府秋七月乙巳宋主遣使奉表

請和詔進兵伐之以故宋主父子赴上京八月乙卯羅

索敗宋兵于華州額特埒破敵于渭水遂取下邽丁丑
以故宋主父子素服見太祖廟遂入見于乾元殿封其
父為昏德公子重昏侯是日告于太祖廟以州郡職員

名稱及俸給因革詔中外九月辛丑勝額等屢敗宋兵

乙丑取丹州

按金史載天會六年九月勝額等屢敗宋兵取丹州而弘簡錄載天會三年十二月

勝額以三百騎過中山戍兵三萬力戰死之彼此互異

冬十月戊寅徙昏德公重

昏侯于韓州庚辰宗翰宗輔會于濮伐宋十一月庚寅
富察羅索取延安府壬辰賑伊蘭路乙未取濮州綏德

軍降羅索再攻晉寧軍十二月丙辰宗弼取開德府丁卯宗輔克大名府呼沙呼敗宋兵于鞏

七年春正月辛巳吳國王棟摩亮甲午以韓企先同中書門下平章事知樞密院事二月戊辰宋麟府路安撫

使折可求以麟府豐三州降

按金史天會七年二月戊辰宋麟府路安撫使折可

求以麟府豐三州降已已羅索破晉寧軍擒其守徐徽言使降將折可求諭之降宋史于十一月攻晉寧下載徐徽言拒却之知府州折可求以城降月日既與此異而折可求知府州亦非為麟府路安撫使所載俱不同今仍原文已已羅索等破晉寧軍其守徐徽言據于城而附識之

拒戰庚午率衆潰圍走擒之命降將折可求諭之降徽
言與其將孫昂及士卒皆不屈乃殺之甲戌詔禁遼代
山陵樵採三月壬寅詔軍興以來良人被驅畧者聽其
父母夫妻子贖之夏四月富察羅索取鄜坊二州五月
乙卯巴爾斯等襲宋主于揚州秋九月丙午朔日有食
之庚午宗弼敗宋兵于睢陽辛未降其城是月曹州降
冬十月丙子朔京兆府降丁丑鞏州降丁酉阿里當堪
大臭破宋師于壽春己亥宋安撫使馬世元以城降甲

辰廬州降十一月丙辰宗弼取和州壬戌渡江敗宋副
元帥杜充軍于江寧丁卯克江寧十二月丙戌宗弼取
湖州丁亥克杭州遣將追宋主于明州越州降戊戌阿
里富將瑄敗宋兵于東關遂濟曹娥江壬寅敗宋兵于
高橋宋主入于海

八年春正月丁巳以韓企先為尚書左僕射兼侍中己
未阿里富將瑄克明州執其守臣趙伯諤庚申阿里布
色哩頁下太平順昌及濠州是月宋副元帥杜充以其

衆降二月乙亥宗弼還自杭州庚寅取秀州戊戌取平
江汴京亂三月丁卯達達哩平之宗弼及宋韓世忠戰
于鎮江不利夏四月丙申復戰于江寧敗之諸軍渡江
是日阿里布戰于拓犖己亥周企戰于壽春辛丑羅索
戰于淳化皆勝之遂克邠州五月癸卯禁私度僧尼及
繼父繼母之男女無相嫁娶戊申詔簽河北河東軍贖
其家屬之流寓河南而被俘掠為奴婢者六月壬申遣
耶律喀勒扎蕭必拉哩等十人分治新附州鎮癸酉詔

以昏德公六女為宗婦秋七月以皇子右副元帥宗輔
經略陝西丁卯帝如東京溫湯徙昏德公重昏侯于呼
爾哈路九月戊申立劉豫為大齊皇帝世修子禮都大
名府辛酉安班貝勒都元帥果亮癸亥宗輔等敗宋張
浚軍于富平耀州降乙丑鳳翔府降冬十月乙亥帝至
自東京甲申以鐵驪圖嚙拉同中書門下平章事詔遼
宋官上本國詔命等第換授十一月甲辰宗輔下涇州
涇原二州降宋涇原路統制張中孚知鎮戎軍李彥琦

以衆降馬五等擊宋吳玠軍于隴州十二月丁丑完顏
羅索亮乙酉宗輔敗宋劉維輔軍壬辰熙州降

九年春正月戊申給海蘭路諸穆昆田癸丑以時立愛
為侍中知樞密院張忠嗣為宣政殿大學士知三司使
事宗弼阿里布撫定鞏洮河樂西寧蘭廓積石等州湮
原熙河兩路皆平夏四月己卯詔新徙戍邊戶有典質
親屬奴婢者官為贖之戶計其口少者以官奴婢益之
使戶為四口又乏耕牛者給以官牛別委官勸督田作

其績遷戍戶在中路者姑止之五月丙午分遣使者諸路勸農六月壬辰賜昏德公重昏侯時服各兩襲秋九月己酉和州回鶻執耶律達實之黨薩巴德埒托多來獻冬十月薩里罕攻下慶陽慕洧以環州降宗弼與宋吳玠戰于和尚原不利十一月己未遷趙氏疎屬于上京以陝西地賜齊

十年春正月壬子詔士庶之族賦役均之二月庚午賑上京路戍邊明安民夏四月庚午以太祖孫亶為安班

貝勒皇子宗磐為古倫烏赫哩貝勒宗幹為古倫左貝勒左副元帥宗翰為古倫右貝勒兼都元帥右副元帥宗輔為左副元帥庚寅以鴨綠混同江暴漲命賑徙戍邊戶閏月辛卯分遣呼沙呼等十二人閱諸路丁壯調赴軍秋七月甲午賑秦州路戍邊戶帝如中京九月耶律伊都謀反出奔其黨蕭高陸伏誅蕭特默格自殺冬十月壬寅大赦帝如興中府十一月癸未薩里罕請取劍外十三州從之部族節度使特古斯捕斬伊都及其

諸子函首來獻十二月庚子薩里罕克金州帝至自興中府

十一年春正月丁卯薩里罕敗吳玠于饒風關戊辰取洋州甲戌入興元府二月己亥元帥府言承詔賑軍士請自元帥以下有祿者出錢助給之詔毋取于臣下悉從官給秋八月戊子趙栲誣告其父昏德公謀反伏誅

按沂王栲以誣告其父被誅真亂臣賊子之尤然流離至此尚忍而為之誠如通鑑輯覽

御批責其家教人心穢欵無所逃其罪也謹識于此

戊戌詔曰比以軍旅未定嘗命

帥府擇人授官今並從朝廷選注冬十一月丙寅賑伊
蘭路宗弼克和尚原十二月癸未賑海蘭路

十二年春正月甲子初改定制度詔中外丙寅如東京
二月丁酉薩里罕敗宋吳玠軍於固鎮夏四月至自東
京六月甲午以阿里布為元帥右都監

十三年春正月丙午朔日有食之己巳帝崩于明德宮
年六十一諡曰文烈皇帝加諡體元應運世德昭功哲
惠仁聖文烈皇帝陵曰恭陵

太宗天會十三年

欽定續通志卷四十七

欽定四庫全書

欽定續通志卷四十八

金紀二

熙宗

海陵

熙宗皇帝諱亶本諱哈喇太祖孫景宣皇帝子母富察氏天會十年宗翰宗輔希尹入朝與宗幹議以自杲薨後安班貝勒虛位已久哈喇先帝嫡孫當立相與請於太宗者再三迺從之四月庚午詔定為儲嗣十三年正

月己巳太宗崩庚午即皇帝位二月乙巳追謚太祖后唐古氏曰聖穆皇后費摩氏曰光懿皇后辛酉改葬太祖於和陵三月庚辰謚大行皇帝曰文烈廟號太宗乙酉葬太宗於和陵甲午以宗翰為太保領三省事封晉國王夏四月丙寅昏德公趙佶薨遣使致祭及賻贈五月甲申左副元帥宗輔薨秋九月壬申追尊皇考豐王為景宣皇帝廟號徽宗皇妣富察氏為惠昭皇后戊寅尊太祖后赫舍哩氏太宗后唐古氏皆為太皇太后冬

十一月以宗磐為太師乙亥初頒歷己卯以完顏希尹為尚書左丞相兼侍中太子少保高慶裔為左丞蕭慶為右丞十二月癸亥以京西鹿園賜農民

天會十四年春正月己巳朔帝朝太皇太后於兩宮丁丑太皇太后赫舍哩氏崩三月壬午以太保宗翰太師宗磐太傅宗幹並領三省事秋八月丙辰追尊九代祖以下曰皇帝皇后始祖曰景元皇帝廟號始祖后曰明懿皇后德帝曰德皇帝后曰思皇后安帝曰安皇帝后

曰節皇后獻祖曰定昭皇帝廟號獻祖后曰恭靖皇后
昭祖曰成襄皇帝廟號昭祖后圖克坦氏曰威順皇后
景祖曰惠桓皇帝廟號景祖后唐古氏曰昭肅皇后世
祖曰聖肅皇帝廟號世祖后納喇氏曰翼簡皇后肅宗
曰穆憲皇帝廟號肅宗后富察氏曰靖宣皇后穆宗曰
章順孝平皇帝廟號穆宗后烏庫哩氏曰貞惠皇后康
宗曰獻敏恭簡皇帝廟號康宗后唐古氏曰敬僖皇后

按金史熙宗天會十四年追尊九代帝后而未載謚號
以已見於世紀及后妃傳也茲既刪去世紀而后妃傳

又始自太祖聖穆皇后
故補載九代謚號於此
定始祖景祖世祖太祖太宗廟
皆不祧

十五年春正月癸亥朔帝朝太皇太后於明德宮夏六
月庚戌尚書左丞高慶裔轉運使劉思有罪伏誅秋七
月辛巳太保領三省事晉國王宗翰薨冬十月乙卯以
達蘭為左副元帥封魯國王宗弼右副元帥封潘王知
樞密院事兼侍中時立愛致仕十一月丙午廢齊國降
封劉豫為蜀王置行臺尚書省於汴十二月癸未詔改

明年為天眷元年大赦命韓昉耶律紹文等編修國史
以勗為尚書左丞同中書門下平章事徙蜀王劉豫於
臨潢府

天眷元年春正月戊子朔帝朝明德宮頒女真小字二
月壬戌帝如約羅春水乙丑幸天開殿己巳詔罷拉林
水混同江護邏地與民耕牧三月庚寅以禁苑隙地分
給百姓夏四月丁卯命少府監盧彥倫營建宮室止從
儉素壬午朝享於天元殿五月己亥詔以經義詞賦兩

科取士六月戊午帝至自天開殿秋七月壬寅左丞相

希尹罷八月甲寅朔頒行官制

按大金國志載天會十三年五月改定官制與

此年月並異考金史百官志僅載熙宗定官制而未詳年月今仍本紀原文

已卯以河南地

與宋以右司侍郎張通古等使江南以京師為上京府
曰會寧舊上京為北京九月乙未詔百官誥命女真契
丹漢人各用本字渤海同漢人丁酉改燕京樞密院為
行臺尚書省甲辰以奕為平章政事冬十月甲寅朔以
李德固為參知政事己巳始禁親王以下佩刀入宮辛

未定封國制癸酉以宗雋為尚書左丞相兼侍中封陳王十一月丙辰以康宗以上畫像畢奠獻於乾元殿十二月癸亥新宮成丁丑立貴妃費摩氏為皇后

二年春正月以宗雋為太保領三省事進封兗國王完顏希尹復為尚書左丞相兼侍中二月乙未帝如天開殿三月丙辰命百官詳定儀制夏四月甲戌百官朝參初用朝服己卯宋遣使謝河南地五月乙巳帝至自天開殿六月己酉朔初御冠服秋七月辛巳宗磐宗雋謀

反伏誅丙戌以宗弼為都元帥進封越國王己丑以達
蘭為行臺左丞相杜充為行臺右丞相蕭寶即律暉行
臺平章政事甲午咸州詳袞沂王暈坐與宗磐謀反伏
誅辛丑以宗幹為太師領三省如故進封梁宋國王八
月辛亥復誅反者達蘭及翼王呼蘭等九月戊寅朔降
封太宗諸子丙申初居新宮立太祖原廟於慶元宮壬
寅宋遣王倫等乞歸父喪及母韋氏等拘倫不遣冬十
二月豫國公昱薨

三年春正月以宗弼領行臺尚書省事夏四月己巳朔
溫都思忠廉問諸路得廉吏杜遵晦等百二十四人各
進一階貪吏張軫等二十一人皆罷之癸丑蜀國公完

顏尼楚赫薨五月詔復取河南陝西地

按大金國志載連蘭廢偽齊乃

議以河南陝西地歸宋時烏珠不能力爭及連蘭誅烏珠得政決欲敗盟天眷三年五月詔復取河南陝西地

蓋從烏珠

宗弼以兵自黎陽趨汴

按續通鑑綱目載烏珠以兵自黎陽趨汴

薩里罕出河中趨陝西是分兩道進兵也與此正同大金國志載分四道南侵烏珠命聶呼貝勒出山東薩里罕侵陝右李成侵河南自率精兵十餘萬趨汴是別出聶呼李成二軍矣宋史亦載金人敗盟烏珠等分四道

來薩里罕出河中趨陝西六月詔使決西京囚秋七月

癸卯朔日有食之乙卯宗弼奏河南陝西捷

按金史載天眷三年

七月宗弼遣奏河南陝西捷八月詔撫諭陝西五路又載九月宗弼來朝十二月上言宋將岳飛張俊韓世忠率師渡江詔命擊之考續通鑑綱目及大金國志與宋史所載宗弼一軍已捷河南而薩里罕自河中渡河克永興軍後至鳳翔為姚仲所敗攻涇州為田晟所敗是陝西猶未告捷至烏珠與劉錡戰敗於順昌遂還汴京亦無九月入朝之事又案宋史載七月烏珠與宋岳飛戰於鄆城大金國志載烏珠自順昌敗後及秋再提兵與岳飛戰至朱仙鎮飛得班師詔而還則岳飛亦無至十二月乃渡江之事且是時兩國之兵無日不戰又何俟上書而詔命擊之恐金史不無誤載

丁卯詔文武官五品以上致仕給

俸祿之半八月辛巳詔撫諭陝西五路九月戊申帝至燕京己酉親饗太祖廟癸亥殺左丞相完顏希尹等冬十一月癸丑以孔子四十九代孫璫襲封衍聖公癸亥以蕭仲恭為尚書右丞昂為平章政事十二月己亥以阿里布為左副元帥薩里罕為右副元帥

皇統元年春正月庚戌羣臣上尊號初御袞冕謝太廟大赦改元己未夏國請置權場許之二月宗弼克廬州乙酉改封海濱王耶律延禧為豫王追封昏德公趙佶

為天水郡王

按昏德公已薨於天會十三年四月此處不得統云改封考續通鑑綱目載宋高宗

紹興十一年金追封昏德公為天水郡王重封昏侯為天水郡公即金皇統元年也茲據改封重昏

侯趙桓為天水郡公戊午帝親祭孔子廟北面再拜退

謂侍臣曰孔子雖無位其道可尊萬世景仰可不致敬

乎夏四月丙子以韓昉參知政事辛巳宗弼請伐江南

從之五月己酉太師領三省事梁宋國王宗幹薨六月

甲午紀王宗強薨秋七月癸卯以景宣皇帝忌辰命尚

食徹肉丙午以宗弼為尚書左丞相兼侍中九月戊申

詔賜鰥寡孤獨不能自存者人絹二匹絮三斤宗弼伐
宋渡淮以書讓宋宋復書乞罷兵宗弼以便宜畫淮為
界冬十二月天水郡公趙桓乞本品俸詔調濟之

二年春二月甲戌賑熙河路辛卯宋使曹勛來許歲幣
銀絹二十五萬兩匹畫淮為界世世子孫永守誓言壬

辰以皇子生赦中外

金史皇子濟安生在是年二月大金國志則在三年六月

三月

丙午以宗弼為太傅丙辰遣左宣徽使劉筈以袞冕圭
冊冊宋康王為帝歸宋帝母韋氏及天水郡王并妻鄭

氏宋帝故妻邢氏喪於江南戊午立子濟安為皇太子

丙寅以臣宋告中外秋七月丁酉賜宗弼金券八月丁

卯詔歸宋使朱弁張邵洪皓

大金國志作三年六月

復太宗子呼

嚕為王賑陝西冬十一月甲寅平章政事漆水郡王昂

薨追封鄆王

按昂本傳載皇統二年封鄆王是歲薨此云追封鄆王所載互異

十二月

甲申皇太子濟安薨

三年春三月辛卯以勗為平章政事宗憲為尚書左丞

丁酉太皇太后唐古氏崩己酉封子道濟為魏王夏五

月甲申初立太廟社稷冬十二月癸未朔日有食之
四年春正月己未以宋使王倫為平州轉運使既受命
復辭誅之夏六月辛巳朔日有食之秋七月庚午建原
廟於東京八月癸未殺魏王道濟九月乙酉帝如東京
壬子畋於沙河冬十月乙卯遣使祭遼主陵十一月贖
陝西蒲解汝蔡等處流民典催為奴婢者

五年夏六月乙亥朔日有食之冬十月辛卯增謚太祖
十二月戊申增謚始祖以下十帝及太宗徽宗

六年春正月壬申封太祖諸孫為王庚寅以邊地賜夏
國壬辰如春水三月壬申以阿里布為行臺右丞相夏
四月庚子朔以宗固為太保右丞相兼中書令戊午行
臺右丞相阿里布薨五月辛卯以劉箬為行臺右丞相
六月殺宇文虛中及高士談是歲遣鈕祜祿罕努招耶
律達實被害

七年春正月癸未以西京鹿園為民田夏四月戊午宴
於便殿殺戶部尚書宗禮六月丁酉殺橫海軍節度使

田穀左司郎中奚毅翰林待制邢具瞻及王植高鳳廷
王傲趙益興龔夷鑒等秋九月太保右丞相宗固薨以
都元帥宗弼為太師領三省事都元帥行臺尚書省事
如故遷改平章政事勗及秘書監蕭肄等職冬十一月
癸酉以布薩達斡為御史大夫癸未以宗憲為行臺平
章政事同判大宗正事亮為尚書左丞十二月戊午以
秉德為參知政事

八年夏四月戊子朔日有食之辛丑遣參知政事秉德

等廉察官吏六月乙卯以蕭仲恭為行臺左丞相亮為
平章政事唐古辯為尚書左丞秋七月乙亥以阿魯岱
為御史大夫戊寅以唐古辯奉職不謹杖之八月庚子
遷尚書左丞相勗等職閏月丙寅太廟成九月丙申以
稟為尚書左丞冬十月辛酉太師領三省事都元帥越
國王宗弼薨據大金國志
作皇統七年十一月左丞相宗賢等言州
郡長吏當並用本國人帝曰四海之內皆朕臣子若分
別待之豈能致一自今本國及諸色人量才通用之辛

丑以宗賢為左副元帥亮為尚書左丞相兼侍中秉德為平章政事庚戌宗賢復為太保左丞相左副元帥如故十二月乙卯以蕭仲恭為太傅領三省事亮為尚書右丞相乙亥以宗賢為太師領三省事兼都元帥

九年春正月戊戌以勗為太師領三省事充為尚書左丞相亮兼都元帥壬寅左丞相充薨丙午以亮為左丞相宗本為尚書右丞相宗敏為都元帥宗賢為左副元帥兼西京留守己酉宗賢復為太保領三省事二月甲

寅唐古辯復為尚書左丞稟為行臺平章政事三月癸未朔日有食之辛丑以宗本為尚書右丞相兼中書令亮為太保領三省事夏五月戊子以天變肆赦殺草詔翰林學士張鈞是日曲赦上京囚庚寅出亮領行臺尚書省事戊申殺宿直將軍蕭榮秋八月以劉筈為司空行臺右丞相如故杖平章政事秉德殺左司郎中薩哈九月丙申以亮復為平章政事戊戌以宗本為太保領三省事宗敏領行臺尚書省事秉德為尚書左丞相劉筈

為平章政事庚子以宗甫為參知政事冬十月乙丑殺
北京留守胙王元及弟安武軍節度使扎拉左衛將軍
塔斯大赦癸酉以翰林學士京為御史大夫十一月癸
未殺皇后費摩氏名胙王妃薩滿入宮戊子殺故鄆王
子阿蘭達蘭癸巳帝獵於和羅溫圖瑁遣使殺德妃烏
庫哩氏及瓜爾佳氏張氏十二月己酉朔帝至自獵所
丙辰殺妃費摩氏於寢殿丁巳平章政事亮與駙馬唐
古辯寢殿寶達爾大興國護衛十人長呼圖額呼楚克

等作亂帝崩年三十一亮降帝為東昏王大定初追謚曰武靈皇帝加謚弘基纘武莊靖孝成皇帝廟號熙宗陵曰思陵

熙宗天會二年

仍太宗年號

天眷三年皇統九年凡十

四年

廢帝海陵庶人亮字元初本名都古爾訥遼王宗幹第二子也母大氏初為奉國上將軍赴梁王宗弼軍前任使以為行軍萬戶遷驃騎上將軍皇統四年加龍虎衛

上將軍為中京留守遷光祿大夫為人倬急多猜忌殘忍任數初熙宗以太祖嫡孫嗣位亮意以為宗幹太祖長子而已亦太祖孫遂懷覬覦七年拜尚書右丞八年拜右丞相九年正月兼都元帥熙宗使實達爾大興國賜亮生日悼后附賜禮物熙宗不悅杖興國追其賜物亮由此不自安三月拜太保領三省事益邀求人譽引用勢望子孫結其懽心學士張鈞草詔忤旨熙宗問誰使為之左丞相宗賢以太保對熙宗不悅遂出領行臺

尚書省事至良鄉召還亮大恐既至復為平章政事由是益危迫熙宗嘗以事杖唐古辯及秉德二人懷怨望

乃與大理卿烏達同謀廢立令烏達以所謀告亮

按金史載

辯與秉德以事被杖而辯與烏達謀廢立未載秉德與謀又載烏達先以所謀告亮是辯亦不與知而為烏達私意也下載他日亮問辯若舉大事云云是所問者非以謀來告之人未免突然考弘簡錄載秉德辯與烏達三人同謀廢立令烏達先告亮於事理較合今改輯

他日亮問辯若舉大事誰可

立者辯以昨王常勝對問其次以鄧王子阿蘭對亮謂阿蘭屬疎安得立辯曰公豈有意邪亮曰果不得已舍

我其誰遂旦夕相與密謀護衛將軍塔斯疑之以告悼
后曰辯等每相聚語竊疑之后以告熙宗熙宗召辯曰
爾與亮謀何事將如我何杖之會河南兵士孫進自稱
皇弟熙宗有弟常勝扎拉亮乘此構之熙宗使塔斯鞠
之無狀亮以塔斯鞠不以實俱殺之護衛十人長布薩
呼圖舊受宗幹恩圖克坦額呼楚克與亮姻家大興國
給事寢殿夜從主者取符鑰歸家以為常興國嘗以李
老僧屬亮得為尚書省令史故使李老僧結興國為內

應十二月丁巳布薩呼圖額呼楚克當夜直興國取符
鑰啓門納亮及秉德辯烏達圖克坦貞李老僧等入至

寢殿遂弑熙宗秉德等奉海陵坐

按金史於此云秉德等未有所屬考上文

辯與亮問答既有公豈有意及舍我其誰之語則其意久屬於亮且至熙宗寢殿之時亮身與俱是固顯為首謀何云秉德等未有所屬乃俟呼圖決議也前後未免矛盾弘簡錄直載秉德等奉亮坐羅拜稱萬歲深合情實今
改羅拜稱萬歲詐以熙宗欲議立后召大臣遂殺曹國

王宗敏左丞相宗賢是日以秉德為左丞相兼侍中左
副元帥辯為右丞相兼中書令烏達為平章政事呼圖

為左副點檢額呼楚克為右副點檢貞為左衛將軍興國為廣寧尹太師領三省事勗等進爵增秩大赦改是年為天德元年甲子召秉德辯烏達呼圖額呼楚克興

國六人賜誓券

按興國為廣寧尹賜誓券後金史無所載而大金國志載興國別名為梁漢臣

天德二年七月除右丞相凡海陵遼燕營汴伐宋皆漢臣先啓其謀又據續通鑑綱目載海陵南侵敗於采石斬梁漢臣率其衆趨揚州是興國至正隆末乃被誅也丙寅以劉麟為參知政事

乙亥追謚皇考太師憲古弘道文昭武烈章孝睿明皇

帝廟號德宗

二年春正月以蕭裕為秘書監癸巳尊嫡母圖克坦氏及母大氏皆為皇太后名圖克坦氏宮曰永壽大氏宮曰永寧乙巳詔以七事布中外勵官守務農時慎刑罰揚側陋恤窮民節財用審才實帝每飾情貌以御臣下取軍士糲飯食之以敝衾覆衣輒服補綴令記注官見之二月戊申朔封子元壽為崇王戊辰羣臣上尊號曰法天膺運睿武宣文大明聖孝皇帝三月丙戌以弟亮為司徒兼都元帥夏四月戊午殺太傅領三省事宗本

尚書左丞相唐古辯判太宗正府事宗美遣使殺領行
臺尚書省事秉德東京留守宗懿北京留守卞及太宗
子孫七十餘人周王宗翰子孫三十餘人諸宗室五十
餘人司徒完左丞宗義及秘書監蕭裕等屢加遷改有
差宋夏高麗各遣使賀即位及受尊號秋九月甲午立
惠妃圖克坦氏為皇后冬十月辛未殺太皇太妃蕭氏
及其子任王威赫使使殺行臺左丞相左副元帥薩里
罕於汴并殺平章政事宗義前工部尚書穆里延御史

大夫宗安皆夷其族以魏王威泰之孫呼瀨察好修飾亦族之十一月以圖克坦恭為平章政事張浩為尚書右丞張通古為尚書左丞戊子以十二事戒約官吏帝每與近臣燕語輒引古昔賢君以自況顯責大臣使進直言十二月癸卯詔去羣臣所上尊號癸丑立太祖射碑於赫舍哩部中帝及皇后致奠於碑下己未罷行臺尚書省改都元帥府為樞密院以充為樞密使昂為樞密副使

三年春正月丁亥初造燈山於宮中甲午初置國子監
謂御史大夫趙資福曰汝等多徇私情未聞有所彈劾
朕甚不取自今百官有不法者必當舉劾無憚權貴乙
未帝獵於近郊二月丁巳還宮三月詔廣燕城建宮室
夏四月丙午詔遷都燕京辛酉有司圖上燕城營建制
度陰陽五姓所宜詔無拘泥丙寅罷歲貢鷹隼及皇統
間苑中所養禽獸沂州男子吳真犯法當死有司以其
母老疾無侍為請命官與養濟著為令閏月辛未朔命

尚書右丞張浩調選燕京丙子命大官常膳惟進魚肉
舊貢鵝鴨等悉罷之歸德軍節度使阿里布以撤官舍
材木構私第賜死戊戌詔朝官稱疾不治事者尚書省
令監察御史與太醫同診視無實者坐之五月納所殺
諸宗室之妻於宮中六月丙子殺太府監完顏富魯宋

遣巫伋等祈請山陵

按金史載宋遣使祈請山陵未載
充祈請使人姓名考宋史紹興二

十一年二月遣巫伋等為金國祈請使是為巫伋等無
疑然止載請歸淵聖皇帝及皇族增加帝號等事未言
請山陵據續通鑑綱目亦止載其請迎靖康帝被海陵
詰問仍唯唯而退未載其復請山陵惟大金國志載海

陵間祈請何事。及首言乞修奉陵寢。及迎靖康帝歸。是山陵固屬兼請。而金史止載其祈請山陵餘。俱不載。蓋以請迎靖康。一聞海陵。不知歸後何處。頓放之。詰遂唯唯而退。是其請本非誠心。伏讀通鑑輯覽。

御批

高宗事讐。忘親有所弗顧。作史者因不予。請迎靖康。而僅載其請山陵也。謹錄識之。不許。冬十月。

殺蘭子山明安蕭拱。十二月杖壽寧縣主蘇尼。是歲子
崇王元壽薨。

四年春正月。羣臣請立皇太子。從之。戊戌。初定東宮官屬。立捕盜賞格。癸亥。朝謁世祖。太祖太宗德宗陵。甲子。還宮。二月丁卯。立子光英為皇太子。甲戌。如燕京。夏四。

月丙寅朔詔今歲河南北選人並赴中京銓注六月戊寅權超泰部明安納延伏誅秋七月命崇義軍節度使烏達之妻唐古定格殺其夫而納之九月甲午次中京殺太府少監劉景十月壬戌朔使使奉遷太廟神主於中京殺太祖長公主烏嚕杖罷其夫平章政事圖克坦恭封其侍婢呼達為國夫人冬十一月戊戌以李德固為平章政事辛丑買珠於烏爾古德呼勒部及扶餘路禁百姓私相貿易仍調兩路民夫採珠戊申以前平章

政事圖克坦恭為司徒十二月甲子斬妾人敲僊於中京市庚寅太尉領三省事樞密使充費

貞元元年春正月辛卯朔帝在中京不視朝詔有司受宋高麗夏回紇貢獻丙午以中京留守高楨為御史大夫二月庚申帝自中京如燕京三月辛亥帝至燕京初備法駕甲寅親選良家子百三十餘人充後宮乙卯以遷都詔中外改元改燕京為中都府曰大興汴京為南京中京為北京司徒圖克坦恭以下各遷改有差夏四

月戊寅永寧皇太后崩五月辛卯殺弟西京留守博恰
西京兵馬完顏穆喇幹編修官圓福努通進伯特六月
乙丑以耶律恕為參知政事秋七月戊子朔徵先所賜
朝官京城隙地冬十月丙子命內外官聞大功以上喪
止給當日假父母喪給假三日十一月瑤池殿成庚戌
以昂為左丞相布薩思恭為樞密使十二月戊午賜貴
妃唐古定格家奴孫梅進士及第辛未封所納皇叔曹
國王宗敏妃阿蘭為昭妃丙子貴妃唐古定格坐姦賜

死閏月乙酉朔殺護衛特默格癸巳定社稷制度癸卯以圖克坦恭為太師領三省事如故命西京路統軍達蘭西北路招討蕭懷忠臨潢府總管馬和尚烏爾古德呼勒司招討舍音等北巡

二年春正月庚申尚書右丞相蕭裕等謀反伏誅二月甲申朔遷改平章政事張浩以下有差三月丙戌幸大興府遣薦舍桃於衍慶宮夏五月癸丑朔日有食之丁丑太原尹圖克坦額呼楚克伏誅復命其子珠蘇爾乘

傳焚其骨擲水中秋八月丙午以昂去衣杖其弟婦命杖之九月己未常武殿擊鞠令百姓縱觀辛酉以蕭績為參知政事冬十月庚辰朔殺廣寧尹韓王亨

三年春正月辛酉以大臬為太傅領三省事二月壬午罷張中孚遷改左丞相昂等有差三月壬子杖左丞相張浩平章政事張暉及僧法寶乙卯命以大房山雲峰寺為山陵建行宮其麓夏五月丁未朔日有食之癸丑南京大內火乙卯命判大宗正事京等如上京奉遷太

祖太宗梓宮丙寅如大房山營山陵六月丙戌登寶昌
門觀角觝百姓縱觀乙未命右丞相布薩思恭太宗正
丞哈布爾如上京奉遷德宗梓宮及迎永壽宮皇太后
秋七月辛酉如大房山杖提舉營造官耶律安禮等乙
亥還宮八月甲申啓土賜役夫人絹一匹甲午遣平章
政事蕭玉迎祭祖宗梓宮於廣寧乙未增置教坊人數
九月戊申平章政事張暉迎祭梓宮於宗州丁卯帝親
迎梓宮及皇太后於流沙河庚午獵親射鷹以薦梓宮

壬申至自沙沅河冬十月丙子皇太后至中都己卯梓
宮至中都十一月戊申山陵禮成甲寅詔內外大小職
官覃遷一重貞元四年租稅並與放免軍士久於屯戍
不經替換者人賜絹三匹銀三兩丁卯奉安神主於太
廟羣臣稱賀十二月己未帝朝太后於壽康宮

正隆元年春正月己酉羣臣奉上尊號帝自九月廢朝
常數月不出有急奏召左右侍郎中省於卧内庚戌始
視朝乙丑觀角觝戲罷中書門下省以温都思忠為尚

書令昂為太保布薩思恭為太尉樞密院左丞劉萼右丞蕭賸罷蔡松年為尚書右丞樞密副使蕭懷忠罷耶律安禮為樞密副使平章政事蕭玉為右丞相平章政事張暉罷不置平章政事官二月癸酉朔改元大赦庚辰御宣華門觀迎佛賜諸寺僧銀絹辛巳改定內外諸司印記庚子謁山陵辛丑還都三月壬寅朔始定正隆官制并朝參等格夏五月辛亥修容安氏閣女御為妖所憑舞諫宮中命殺之六月庚辰天水郡公趙桓薨丙

成以蔡松年為左丞耶律安禮為右丞駙馬都尉烏庫哩當堪為樞密副使秋七月己酉命太保昂如上京奉遷始祖以下梓宮八月丁丑如大房山行視山陵冬十月乙酉葬始祖以下十帝於大房山丁酉還宮閏月己亥朔山陵禮成羣臣稱賀庚寅杖右丞相蕭玉等

二年春正月帝朝太后於壽康宮

按弘簡錄載正隆二年正月帝朝太后蓋

海陵飾情為孝禮貌頗勤自貞元三年十月迎至壽康宮十二月朝太后後不應至正隆四年始再朝也金史於正隆二年庚寅命韓錫同知宣徽院事以不謝杖之

缺載今補輯

奪所授官二月癸卯改定親王以下封爵等第命置局
追取存亡誥身存者二品之上死者一品參酌削降公
私文書但有王爵字者皆立限毀抹雖墳墓碑志並發
而毀之夏四月戊戌追降景宣皇帝為遼王秋八月癸
卯始置登聞檢院詔尚書省凡事理不當者許投狀類
奏覽訖付御史臺鞠問甲寅罷上京留守司九月戊子
罷護駕軍置龍翔虎步軍罷尚書省文資令史出為外
官冬十月壬寅命會寧府毀舊宮殿諸大族第宅及儲

慶寺仍夷其址而耕種之丁未禁賣古器入他境乙卯
初鑄銅錢十二月己亥以赫舍哩良弼為參知政事

三年春正月宋賀正使孫道夫陞辭帝命敬嗣暉諭責

宋以事上國不誠及納匿叛亡沿邊修備諸事

按弘簡錄載宋

使陞辭海陵諭責之云云考是年九月遷中都屯軍明
安於南京營建南京宮室次年造戰船調諸路軍諭宰
臣以伐宋事則遣汴伐宋久蓄此心於宋使陞
辭而責之蓋先示之以怒也金史失載今補輯丙寅子

舒蘇鄂博死殺太醫副使謝友正及乳母等夏四月丙
辰以北京留守張暉為樞密副使秋七月庚申封子廣

陽為滕王尋薨甲申遷改右丞相蕭玉等職九月辛巳
遷中都屯軍一明安於南京遣吏部尚書李惇等分地
安置冬十一月癸亥詔有司勤政安民癸未詔左丞相
張浩參知政事敬嗣暉營建南京宮室時運一木費至
千萬以五百人牽一車宮成飾以黃金五采間之金屑
飛空亂如霰雪計一殿已鉅億萬成而復毀務極華麗
十二月乙卯以張暉為尚書左丞歸德尹致仕高昭和
碩起為樞密副使

四年春正月丙辰朔帝朝太后於壽康宮庚申更定私
相越境法並論死辛酉罷鳳翔唐鄧穎蔡鞏洮膠西諸
權場置場泗州二月己丑以許霖為御史大夫丁未修
中都城造戰船於通州詔諭宰臣以伐宋事調諸路明
安穆昆軍年二十以上五十以下者皆籍之雖親老丁
多亦不許留侍三月丙辰朔遣兵部尚書蕭恭經畫夏
國邊界遣使分詣諸道總管府督造兵器夏四月庚戌
詔諸路舊貯軍器並致於中都時方建宮室於南京又

中都與四方所造軍器材用皆賦於民箭翎一尺至千錢百姓椎牛以供筋草至於烏鵲狗彘無不被害者辛亥張暉許霖罷以圖克坦貞為樞密副使秋八月詔諸路調馬以戶口為差計五十六萬餘匹富室有至六十匹者仍令戶自養飼以俟冬十月觀造船於通州賜尚書右丞赫舍哩良弼樞密副使圖克坦貞佩刀入宮十二月太醫使祈宰上疏諫伐宋殺之

五年春二月甲戌遣引進使高植刑部郎中海古勒分

道監視所獲盜賊並凌遲處死或鋸灼去皮截手足仍
戒屯戍千戶穆昆等後有獲者並處死總管府官亦決
罰三月辛巳東海縣民張旺徐元等反遣都水監徐文
等率舟師九百浮海討之諭以朕意不在一邑將試舟
師耳庚子以蕭玉為御史大夫司徒如故赫舍哩良弼
為左丞致仕劉長言起為右丞夏四月庚戌昭妃富察
阿里庫有罪賜死甲寅宿州防禦使耶律翼使宋失體
杖二百除名六月徐文等破賊張旺徐元東海平秋七

月癸卯遣使發諸路漢軍八月辛亥命權貨務并印造鈔引庫起赴南京己巳以圖克坦永年為樞密副使辛未謁山陵九月己卯還宮冬十月庚午遣護衛完顏布琳等二十四人督捕山東河東河北中都盜賊十一月乙酉命親軍司以所掌付大興府置左右驍騎都副指揮使隸點檢司步軍都指揮使隸宣徽院十二月戊辰禁朝官飲酒犯者死三國人使燕飲者罪

六年春正月丁丑判太宗正圖克坦貞益都尹京安武

軍節度使與金吾衛上將軍阿蘇飲酒以近屬故杖貞
七十餘皆杖百壬午以蕭玉為大興尹赫舍哩志寧為
樞密副使癸丑命參知政事李通諭宋使徐度等曰朕
昔從梁王軍樂南京風土常欲巡幸今營繕將畢功期
以二月末先往河南帝王巡守自古有之以淮右多隙
地欲校獵其間從兵不踰萬人祖宗陵廟在此不能久
留汝等歸告汝主令有司宣諭朕意使淮南之民無懷
疑懼庚子詔自中都至河南府所過州縣調從獵騎士

二千辛丑殺富察阿固岱女徹辰二月乙巳杖衛王襄之妃及左宣徽使許霖甲寅以李通為尚書右丞庚申徵諸道兵及諸路水手得三萬人運戰船癸亥發中都丙寅次安肅州三月己卯改河南北邛山為太平山稱舊名者以違制論丁亥將至獲嘉有男子上書言事斬之癸巳次河南府詔內地諸明安赴山後牧馬俟秋並發弟究之妻烏雅氏有罪賜死誅其弟南京兵馬副都指揮使實訥夏四月丁未詔百官先赴南京治事尚書

省樞密院大宗正府勸農司太府少府皆徙行吏戶兵

刑部四方館都水監大理司官各留一員以簽書樞密

院事高景山右司員外郎王全等為賀宋生日使

按是時海

陵意欲南侵乃使王全至宋投辭詆責以激宋怒考王

全本宋人直呼故主之名悖逆固甚而高宗不敢害之

已早為海陵所料則其庸懦委

御批罔知自厲不能出人掌握也謹錄識之

戊申詔汝州百五十里內州縣量遣

商賈赴溫湯置市詔有司移問宋人蔡頴壽諸州對境

創置堡戍者庚戌發河南府契丹本布伏道左自陳破

東海賊有功為李惟忠所抑立命斬之丁卯次溫湯誠
扈從毋輒過汝水遣使徵諸道兵五月契丹諸部反六
月癸卯命樞密使布薩思恭西京留守蕭懷忠將兵討
之帝自汝州如南京壬戌次南京近郊左丞相張浩率
百官迎謁癸亥備法駕入南京秋七月丁亥左丞相張
浩等遷改有差己丑賜從駕從行從軍及千戶穆昆錢
帛大括天下羸馬殺亡遼耶律氏宋趙氏凡百三十餘
人八月壬寅單州賊杜奎據城叛遣都點檢耶律湛石

驍騎副都指揮使大磐討之以白彥恭赫舍哩志寧完顏古雲唐古布古德等討契丹癸丑以諫伐宋弒皇太后圖克坦氏於寧德宮并殺侍婢等十餘人癸亥殺右將軍蕭圖喇護衛十人長鄂勒博族樞密使布薩思恭北京留守蕭曠西京留守蕭懷忠杖尚書令張浩左丞相蕭玉甲子封所幸太后侍婢高福娘為鄖國夫人九月庚午朔以昂為樞密使太保如故戊子殺前壽州刺史摩囉歡庚寅大名府賊王九據城叛衆至數萬所至

盜賊蜂起大者連城邑小者保山澤或以十數騎張旗
幟而行官軍莫敢近帝又惡聞盜賊事言者輒罪之帝

自將三十二總管兵伐宋

按金史戴海陵自將三十二總管伐宋而大金國志載有

細軍五千人為親軍未載三十二總管至海陵軍中遇
弒據金史云完顏元宜等謀逆而大金國志作即律勤
農彼此
互異進自壽春以昂為左領軍大都督李通副之赫

舍哩良弼為領右軍大都督烏雅富埒瑁副之圖克坦
貞為左監軍圖克坦朮年為右監軍許霖為左都監富
察鄂倫為右都監名諸將授方畧諭毋淹延歲月又命

蘇保衡為浙東道水軍都統制鄭嘉副之由海道徑趨
臨安劉萼為漢南道行營兵馬都統制布薩烏哲副之
進自蔡州圖克坦喀齊喀為西蜀道行營兵馬都統制
張中彥副之由鳳翔取散關駐軍以俟後命武勝武平
武捷三軍為前鋒圖克坦貞別將兵二萬入淮陰甲午
帝發南京詔皇后及太子光英居守尚書令張浩左丞
相蕭玉參知政事敬嗣暉留治省事時將士自軍中亡
歸者相屬於道哈斯罕明安福壽東京穆昆金住等始

授甲於大名即舉部亡歸從者衆至萬餘皆公言於路
曰我輩今往東京立新天子矣冬十月乙巳東京留守
曹國公烏祿即位於遼陽下詔數海陵罪數十事丁未
大軍渡淮劉芻取通化軍蔣州信陽軍圖克坦貞敗宋
將王權于盱眙進取揚州前鋒軍至段寨宋戍兵皆避
去敗宋兵於蔚子橋及巢縣至和州王權夜以兵來襲
擊却之癸亥帝次和州圖克坦喀齊喀駐散關十一月
庚午帝始聞曹國公東京即位事以完顏元宜為浙西

道兵馬都統制郭安國副之帝駐軍江北遣武平總管
阿林先渡江至南岸失利帝還和州遂進兵揚州甲午
會舟師於瓜洲渡期以明日渡江乙未浙西兵馬都統
荆完顏允直等反帝遇弒崩年四十大定二年降封為
海陵郡生謚曰煬後降為海陵庶人

海陵天德四年貞元三年正隆六年凡十三年

欽定續通志卷四十八